

四庫全書

史部

欽定四庫全書

江西通志卷八十九

人物 二十四

饒州府 三

明

許瑗字栗夫樂平人元末兩舉鄉第一會試不第放浪
吳越間太祖駐婺州瑗謁曰元祚將終四方鼎沸足
下欲定天下非延攬英雄難以成功太祖喜寘幕中

參軍事未幾命守太平府陳友諒以舟師來寇城破

被害

江南通志

吳宏字德廣餘干人元至正間敗賊劉城朶皸遂有饒
信明太祖駐江州以二城來歸命鎮饒州尋率兵取
撫州下武昌論功拜中書左丞參贊徐國公達幕至

秦州卒

林志

王釐字有成鄱陽人博學能文洪武初以明經授本邑
教諭入爲翰林編脩出知南陽府有善政以疾卒所

著有羣英雜言及編緝詩粹數千卷

同上

費震鄱陽人博學多才洪武初以賢良徵授吉水知縣擢漢中知府時歲歉盜起震發粟賑濟盜乃來歸即令占宅自保後以事被逮朝廷以震良吏釋之為牧民者勸尋陞戶部左侍郎進尚書奉旨定丞相御史大夫等官歲祿之數刻石官署調湖廣布政使以老致仕

人物志

祝挺字正夫鄱陽人趙伯同鎮饒辟為叅隨尋除金壇

縣丞遷上海縣時海濱盜起大姓錢鶴臯因煽亂率
衆逼縣治挺於黃浦東植義旗率衆聽約束皆啗指
誓逆黨亦投戈旗下請死餘奔海欲謀叛挺遣唐翼
等追斬之適諜報驃騎已至松江將屠上海挺即函
二首獻俘馳告曰民已定矣驃騎猶欲窮治脅從者
挺曰彼誑誤者何罪不則仍罪我遣吏報克復功於
相國事乃已是時他邑死傷相枕藉而上海獨晏然
擢戶部主事調浙江行省郎中以事去官

同上

余應鳳字士韶德興人洪武初有薦其才於朝者徵授
本邑訓導後兩典郡庠兩使絕域竣事即乞歸洪武
十七年詔徵山林隱逸應詔至闕太祖親試稱旨得
賜遊御苑上親與聯詩各二句成一律授山東布政
司叅議勤咨訪明聽斷清譽著聞考滿赴闕值戶部
侍郎郭桓敗賊問刑官喉桓妄稱寄借滿天下朝臣
以寄贓得罪者數千人禍且不測應鳳辯其冤厲聲
闕下乞帝廷鞫之忤旨廷杖卒於旅邸御史丁廷敏

等因劾奏問刑官妄扯平民上悟刑者伏誅於是寬
者俱得白

豫章書

張琬字宗琰鄱陽人以貢士試高等授給事中改戶部
主事一日帝問天下財賦戶口之數口對無遺帝悅
立擢左侍郎謹身殿災上言時政歲饑請蠲民租百
萬餘石俱見嘉納琬才敏有心計以疾卒官年二十

七時人咸惜之

列卿錄

周湏字伯寧鄱陽人江西十才子之一明太祖以唐宋

皆有成律惟元以一時行事為條格胥吏易為奸詔
李善長等定律令湏為大理寺丞亦預焉書成上稱

善官至刑部尚書

同上

按列朝詩傳以湏為江寧人為饒之長史與此異

十才子者李正叔

初名宗頤

周伯寧劉原善辛敬萬石

楊伯謙查和卿周復其二人失攷

鄭倫字子夔饒之安仁人少攻問學暨長所交皆名流
揭文安虞文靖亟稱之湖南憲使趙之維薦授寶慶

儒學正未赴而天下兵起明太祖初取饒授叅贊江淮幕府專掌鹽利以給軍上親征張氏倫叩馬獻策俘其驍將以病乞歸自號環谷野人洪武乙丑再詔起於家至則年已八十賜坐便殿詢以治道條對具悉欲處以重任以年老辭上親製古詩一章以賜其歸又二年卒

白志

按鄭倫事林志不載安志所載失實白志據天台林右所撰環谷先生墓志補撰又王忠文集有鄭

氏水木居記止叙倫罷官後事茲不贅錄

鄭隆字德隆浮梁人洪武進士授行人出使有能聲還
陳時弊十事擢廣東僉事平反冤獄又遷山西叅議
改廣西暨乞歸妻於舟中語之曰君宦久妾止得一
金環隆索觀而歎曰吾生平與汝無愧於心又何用
此即投水中聞者就其地建棄金亭

安志

程溥字廣初德興人父士宏洪武初因督圖籍觸諱論
死溥以身代至京遇詔得免死黥役赴鳳陽役歸守

者贈以金不受曰吾為父來今得生還見吾父足矣
人以其黥面稱為鐵面佛

錢緒山集

劉仔肩字汝弼鄱陽人洪武初用薦召至京即集都人
士詩為雅頌正音而以已作附入草昧之初風雅賴
以不墜

明詩綜小序

祝孟獻字丕文德興人洪武間御史張宣薦授太僕少
卿掌馬政有區畫上元江寧有抵罪徙雲南者數千
家已就道獻力奏免使朝鮮渡鴨綠江舟遇風幾覆

焚香告天須臾風息至其國遺以金帶辭弗獲回至

江邊解帶還之

人物志

王溥安仁人仕陳友諒為平章守建昌太祖命將攻之不克友諒將李明道等寇信州胡大海往援擒明道及溥弟漢二歸於行省李文忠命二人招溥是歲太祖征漢拔江州溥遂遣使降命仍守建昌明年太祖次龍興率其衆來見數慰勞從歸建康賜第聚寶門外尋遣溥取撫州及江西未附諸郡縣復從克武昌

進中書右丞兼詹事府副詹事從大將軍北伐屢有
戰功尋擢河南行省平章初溥未仕時奉其母葉避
兵貴溪遇亂與母相失凡十八年及是請歸省墳墓
許之且命禮官具祭物溥歸率士卒之貴溪桃源山
求不得晝夜號泣者三日居人吳海言夫人為賊逼
投井中死矣溥求得井有鼠自井出投溥懷中旋復
入井遂汲井索之母屍果在哀呼不自勝乃具棺斂
即其地葬之溥卒子孫世襲指揮同知

白志

戴璫字仲才浮梁人從吳仲迂游避居講學明初累薦不起時定賦役法浮梁獨重於他邑璫上章亟言得與他邑均邑民至今賴之所著有東山集

林志

徐文郁字晦之浮梁人洪武初應詔上顧問曰天下如何治對曰君仁則治又問百姓如何安對曰有司得其人則安將授以官泣請歸養

同上

張煥然浮梁人父信立初坐註累得罪且死煥然請代上憐而兩赦之檇李楊昇為之傳

同上

金良佐鄱陽人幼好學通經史洪武十五年詔求賢才
邑令以良佐應詣京帝咨問備至奏對稱旨拜廣東

右布政使十八年被召入京卒

人物志

高貞字景瓚以字行樂平人以明經薦知休寧擢大理
右寺副帝時以嚴勝寬犯重者每不釋景瓚奏讞必
擇犯輕者列於前帝首覽輕犯多輒肆赦全活者衆

卒於官

安志

計澄字本清浮梁人知永康調商河擢監察御史以直

言忤時謫廬州推官起守楚雄政為滇列郡最陞廣

西按察使

同上

章復字彥復鄱陽人仕元歷行省檢校洪武元年下湖
湘得百粵地授全州府同知值旱蝗徒跣詣覆釜山
叩禱輒應民勒石頌功全故闕守六年即陞復為守
先後三閱考嘗樹松夾道百里以憩行人至是陰可
覆路行者呼章公松尋改全為州移知保寧府逾年
乞致政乘傳歸復器宇凝重學問該博尤工篆隸人

金石錄卷八十九
物志

李泰號西珉德興人元至正兵亂倡義兵保閭里明太祖知其名遣使聘之從駙馬王克恭守新安改文秩

歷官刑部侍郎戶部尚書

同上

王和字叔和德興人洪武初以選貢擢太常博士丁外艱起復雲南亦佐縣知縣時越州反地隣亦佐西平侯將兵擊之兵已壓境和謁侯以身家保民無他辭甚激切侯令速馳赴邑邊疆各豎木牌以表識兵過

秋毫無犯民胥感曰我公以木牌活一縣造庭羅拜而去調江山縣陞建州知州兗州府知府改武昌卒

於官

安志

蔣惠字貴和鄱陽人太祖征陳友諒於鄱陽惠上書謁見遂留叅政務洪武元年授廣東行省左司員外遷禮部郎中坐事左遷華亭知縣時舊令誣伏平民李秀三等二十人為盜惠察其枉悉釋之密授捕兵方畧獲真盜正其罪民頌之後以鈔本事去官

人物志

操琬字公琰樂平人少博學有才氣從程時登學一時
朋游如朱公遷董彞皆邃義理汎博古今琬摩礪其
間所造益深元至正四年舉於鄉歷池州學錄洪武
初詔起山林遺逸之士預修元史琬年七十餘入館
閣帝命儒臣與談論酬荅如響舉事無所遺尋以疾
歸田里

府志

程本初名本以字行樂平人洪武間舉明經授南陽同
知南陽久經兵革蹂躪公宇燬滅百姓流離本初極

力懷綏建公署學校繕城池相度經營吏服其能民

安其業

人物志

方素易名岐以字行樂平人洪武間舉明經訓導淮安府擢知盱眙縣以母憂去百姓赴闕乞留帝嘉之賜鈔錠衣物以旌其能擢金華府有善政

同上

俞敬德浮梁人與同邑查仲原同登洪武初吳伯宗榜敬德知海州兵燹之後極力撫循而流亡還定田野以闢仲原通判肇州在嶺徼外善折疑獄動引春秋

時並稱之

同上

江春字九齡鄱之新城鄉人至正末倡義兵保鄉閭徐
壽輝陷饒署春為左丞屯都昌香溪壽輝被陳友諒
殺春思報之遂歸附除權江南行省左丞隨上克江
州豫章諸郡解安豐圍敗友諒於康郎山除同知雄
武衛親軍指揮使司事遷同知振武衛繼從諸將下
泰通湖蘇浙西諸州擒張士誠定河南郡拜懷遠大
將軍平雁門雲中守禦大同與世襲大同衛指揮同

上

徐便字宗文鄱陽人幼習騎射鄉兵起推便為長便度
兵少依于光以自固歸附後光每有功能與焉授武
畧將軍定遼尉副千戶尋委攝遼陽府事至蓋牟迎
敵度道隘因疊冰成壘斷歸路大有俘獲進階武毅
將軍尋以功擢明威將軍僉海州衛指揮事卒便練
達勇敢詰戎之暇手不釋卷好歌詩每行次輒賦以

紀事

同上

胡閏字松友鄱陽人太祖征陳友諒過長沙王吳芮祠見閏題壁詩竒之洪武四年郡舉秀才入見帝曰此書生故題詩鄱陽廟壁者邪授都督府都事遷經歷建文初選右補闕尋進大理寺少卿燕師起與齊黃輩晝夜畫軍事燕王入京首召方孝孺草詔繼召閏及高翔三人至則衰絰望闕慟哭聲徹殿陛乃趣閏先入諭令更服閏曰死即死耳服不可更也以族誅恐之不動命武士舉金瓜擊其齒齒盡抗聲不絕大

怒命縊死以石灰水浸脫其皮實以草成人形懸武
功坊即日籍其家子傳道與姻族二百十七人皆繫
市駢斬之幼子傳慶及其外親之姻戚一百餘人俱
戍邊閨妻汪氏縛就刑部時四歲女郡奴自懷墜或
提入功臣家付爨婢牧之洪熙初赦還鄉貧甚誓不
嫁嘉靖時提學副使邵銳立祠祀閨以郡奴祔福王
時贈閨刑部尚書謚忠烈女郡奴謚孝貞

白志

按人物志妻汪氏作方氏

甘復字克敬餘干人至正末張仲舉僑居雲錦山中克敬與甘彥初張可立往從之游仲舉少許可獨推重三君明初皆以前元遺才為士林推重彥初詩多流傳克敬集成化中同里趙琥刻之惟可立不著

列朝

詩傳

按趙琥復同里後進前志以為復孫今改正

齊琦字仲圭號易巖德興人世以儒學名從祖夢龍貴澄皆精邵氏易貴澄常註經世觀物等書琦自幼領

悟其旨建昌廖應淮同郡祝秘傳立皆傳邵子學琦
既承家學兼得祝氏傳氏之傳由聲色氣味以起數
而推極乎元會運世即其數之所見天地氣運之否
泰生人吉凶休咎之徵無不可預定其言人未至之
事如在目前嘗語人曰自今以往天下多故不十五
年京邑南遷千里矣未幾朝廷削弱權臣挾皇嗣駐
江南又嘗曰南士行入風憲矣時省臺擯南人不用
已久未幾果有詔用南人其精驗類如此然非可語

者雖貴人概不與通嘗署初菴書院山長後屏居鄱陽山中琦雖精於數學然通經史大義非以術數名家立言必歸仁義有關世教士大夫用是尤尊慕之

王忠文傳

按齊琦前志不載今從忠文集采補縣志又言琦洪武初教授婺源上遣使與語奇之徵拜太史卒于官

潘懷字景進鄱陽人元季與弟侍父希古北走遇寇郭

璞山下縛希古索金露刃脅之懷引顙請代父弟亦
爭代寇憐其孝併釋之洪武四年懷被薦子震善詩
安志

朱元律浮梁人洪武中為福清丞周知民情累歲逋負
不勞而集知縣汪仁狷介元律每濟以和

福建通志

徐旭字孟昭樂平人洪武進士授浙江道監察御史改
禮科又改庶吉士日記事侍上左右帝方屬意進士
每朝羣臣退嘗留備顧問一日呼旭至前將有所任

使而奏對弗克稱旨命分教於房山復教諭鳳陽擢知州事入史館上書論天下事多不能合遂自史館出為吏部考功員外郎永樂元年拜國子祭酒旭初在考功以天下之治教在守令與教官守令教官弗稱其任者尤精覆之無少貸及在太學亦如在考功時僅一年諸生凜凜謹自脩飭而僚屬之不便者譁然議調雲南叅議帝問吏部尚書蹇義曰旭為人何如對曰有文學持守而於人寡合帝曰持守之人固

當寡合況兼有文學乎宜寘之近侍特命除翰林修

撰四年考試春闈得疾卒

人物志

余仲敬德興人芑舒孫孩時便識日月字長讀書過目
成誦為文操筆立就曾赴浙闈與同輩詣望江亭觀
濤遂成吳山賦雄壯跌宕衆皆歎服試不偶退而潛
心周程之學大有所得江淮兵起里中豪傑以舉義
諮仲敬力言不可散之避亂深山雖顛沛流離講學
不輟洪武初中江西鄉試不欲官歸闕一軒扁曰靜

學讀書先六經及子史至相卜地理亦造閭奧郡守

陶安雅重之薦於朝累徵不起

府志

程萬恭樂平人太祖起兵和州見萬恭才幹卓異授總兵檢校命理宣州值斬黃賊侵宣境有致仕尚書汪澤民率義兵拒賊力戰弗克萬恭馳逐尚書幕下俱被殺子蕤賓蔭補國學

人物志

錙炳字彥昂鄱陽人元季兵亂與弟煜結里閭相保寇至却走聞安慶左丞余廷心賢往依之余待以國士

計孤軍不振辭歸說叅政于光曰當今豪傑無可望者惟金陵仁義之師盍就之以立功光喜即遣炳往金陵太祖嘉之留叅贊帷幄久之命叅贊沐總制守鎮江尋授廣武衛親軍指揮使司知事未幾苦目疾得請還鄉復徵大都督府掌記乞外補知東阿縣尋引疾歸著有春雨軒集

同上

洪初字善初樂平人少師朱公遷為詩經學公遷作詩經疏義初旦夕左右面錄所草卒賴以傳洪武初舉

明經署本縣學訓導用薦知開封府洧川縣

同上

王琛字廷實鄱陽人邃於易肆力問學雖遭時亂不廢知府陶安雅善琛洪武九年辟為邑庠訓導後舉應

明經科引疾辭強起之詣京復力辭尋卒

同上

黃季倫別號淳齊鄱陽人自少窮墳典有才識任學博未幾至正兵亂解組歸洪武初詔修元史

安志

劉琮玉字潤芳鄱陽人博通經史百家言陶安覽其詩題集曰清華琮玉純孝母病顚天求代及葬廬於墓

撫從弟妹恩愛篤至

人物志

余彥誠德興人洪武初以薦對策稱旨授安陸州知州積逋未完被逮耆民數百人疏其善政請於朝帝意其要結付法司嚴勘得實陞永州知府時洞寇猖獗彥誠以計擒賊又恩撫之厥後洞蠻畏慕相率詣府請親詣其地彥誠坦懷竟從請歲臨觀以為常諸蠻信而化之尋陞浙江布政司叅議永樂初郡民詣闕借留復調永州知府陞河東轉運使

人物志

余士美字實夫德興人洪武間為本邑訓導遷國子助教帝幸太學命講舜典稱旨賜座褥尋陞磁州知州靖難兵起有王千戶者乘機為變士美劾奏之反為所誣謫海州煎鹽再謫泗州從戎革除後周王新復國上書求為輔導官除周府紀善府寮皆新進士美一老歸然其中有過必諫王獵得奇獸問諸寮莫辨士美曰此騶虞也王獻之朝唐賽兒以妖術作亂王設兵備之事聞逮王并闔府屬皆以輔導不恭論死

獨至士美帝曰此老朕知其素忠特釋之復其官乞

休

同上

盧福安餘干人以吏員授巡檢時交趾叛福安當其衝

夜夢神語見紅綠二旗攻之必勝次日如其言三戰

三捷事聞超陞兵部主事踰時賊復熾遂戰死

安志

張里字示仁德興人涉獵經史有東山集明初平偽齊

里董戰艦叙功當遷以母老辭

人物志

孟常字德常鄱陽人幼有志操洪武二十七年詔求才

幹邑令授蘇州崑山知縣未幾改池州建德邑有蘆束及秋苗逋負累歲徵之不能具常詣闕懇陳得以鈔代部使者言其失職因謝歸永樂元年仍起知建德累考書最留從事秋官調知真定之泱水後致仕安志

莊叔淵鄱陽人貌魁梧負才器有詩名性好遊上會稽浮河洛抵閩海而返趣益高例歲貢材能一人邑令任勉舉叔淵銓曹每試高等授蘇州通判尋調寧波

皆能其官永樂四年求賢詔下寧波復以叔淵應陞

知府提調交趾金冶事踰二年疾卒

同上

朱智字存禮鄱陽人博學多才工古文詩歌洪武間辟為郡掾後薦授靖江王府紀善宣德六年以老致仕

善真行得晉人書法

同上

祝原慶德興人父德忠坐罪且死原慶冒父名代死大

司馬孫原真傳其事

林志

董阜民字德之德興人以明經任工部主事時同官有

被譖繫獄者阜民疾篤恐其罹刑置諫疏於懷死都門上憐其死諫命禮葬之遂赦被譖者

同上

按祝董二人豫章書人物志不載林志不詳時代或云永樂中人

王仲壽字亮中樂平人永樂進士以翰林庶吉士預修永樂大典除山西道御史陞河南右叅議改湖廣水驛著聲察案屈服朝論欲大用之竟以老引年還人

物志

吳惠字澤民浮梁人永樂進士知永興兵部尚書鄺埜薦其賢陞解州知州其俗視永興尤甚惠痛革其弊州輸邊儲挽運甚勞立貧富三等法且聽其附載貨物以易粟上倉費煩減半輸亦告足卒於仕

林志

黃信中餘干人永樂初知樂清縣奸人給寡婦至京誣告鄉人謀叛已而逸去有司繫其婦以聞詔行會鞠信中廉得其情獲全者衆盜殺一家三人獄久不決信中禱于神得真盜後調知錢唐課最當遷特擢杭

州知府

白志

賀祖嗣字思恒鄱陽人永樂進士授刑部主事歷郎中擢行在大理少卿為人廉介精法律任棘寺一十九年讞鞠明允漢府以逆受誅議屠所部祖嗣力言乃止正統九年出知光州尋致仕孫霖字時望成化進士歷官蘇州知府亦廉明有聲

安志

孫原貞名瑀以字行德興人永樂進士授禮部主事歷郎中英宗初用薦擢河南右叅政初永樂中徙江南

富戶於北京逃且絕則於其鄉僉補原貞請令官吏
大戶犯死罪者免其運磚補富戶數從之遷浙江左
布政使正統末閩浙盜大起雖更赦罷兵原貞策其
必叛圖上方畧請為備禦計賊果再叛發兵討命原
貞參議軍事深入擒其魁而溫州餘賊猶未滅命都
指揮李信為都督僉事調軍討之遂拜原貞兵部左
侍郎參軍務鎮守浙江搗其巢俘斬賊首陶得二等
追還被掠男女捷聞璽書獎勵遭母喪奪情起復分兵

勦平餘寇奏析麗水青田二縣地增設雲和宣平景
寧三縣建官置戍盜患遂息論功進秩二等景泰三
年進兵部尚書鎮守如故未幾命考察福建庶官因
留鎮焉福州建寧二府舊有銀冶因寇亂罷朝議復
開原貞執不可乃寢五年冬疏言四方屯軍率以營
繕轉輸諸役妨耕種宜簡精銳實伍餘悉歸之農時
不能盡用後劉千勛等之亂果如原貞所料已復移
鎮浙江罷歸家居十餘年卒年八十七原貞所至有

勞績其在浙江名尤著

列卿錄

徐爵字宗器餘干人永樂進士授監察御史立朝蹇諤
風力素勁人不敢干以私太宗常以小御史呼之

林

志

戴弁字士章浮梁人領鄉薦訓導崇陽召拜兵科給事
中奉旨行邊陞陝西叅議城迭烈以禦寇衝屯張掖
以助軍餉進湖廣叅政調廣東適廉雷諸郡徭犂梗
化挺身出諭之曰我戴叅政也爾輩何敢冒死為此

賊羅拜而退廣州被圍乏食亟發廩賑之募敢死士
焚其攻具遣使間道引援兵入卒平之進布政使丁
內艱詔奪情視事以疾乞歸從子瑞字廷美登進士
選翰林庶吉士授吏部主事陞郎中珉字廷振登進
士授兵部主事轉郎中璉字廷獻登進士授大理評
事蓋一時稱盛云王文端公為志墓

人物志

按戴弁所著有蒙菴集

方冊字載道德興人永樂進士選翰林庶吉士時交陞

初置郡縣選經術疎通識達治體者改授當道縣令
興學育才風俗丕變尚書黃福鎮交趾聞冊多才略
命捕平原大蠻紅衣麻火輪叛寇比至諭以順逆賊
各解去丁外艱補廣東新興令拜監察御史巡山東
廣東轉福建按察使砂尤寇亂諸郡騷動冊馳奏朝
命寧陽侯陳懋刑部尚書金濂督兵討之冊言賊黨
多被脅良民願先入撫之遂深入巢穴招撫不戰而
歸順復業者三萬六千六百餘賊勢日蹙乃分路進

兵討平之卒於官

同上

葉恕字如心樂平人永樂進士拜北平道御史適浙江
温州銀鑛大發廷議須以法官臨之遴選恕往比至
規畫有條尤蘖氷著聲繼按浙江湖廣諸道振吏治
肅紀綱所至郡境晏然以事謫監利丞家居淡薄自
持尤篤孝思構思親堂以志永慕

安志

程善字本善鄱陽人永樂間鄉貢授舒城知縣多惠政
以父憂去舒民詣闕疏留服闋復任舒再丁內艱舒

民留如前詔允之如期起原官前後歷十八年秩滿
又留以知州掌舒城縣事兩自舒還蕭然一橐居宇
不蔽風雨

同上

劉莘字志尹鄱陽人永樂進士授行人奉使歷齊魯閩
蜀關陝足跡遍天下宣德十年遷儀制員外調考功
郎汰官吏六百餘員擢福建叅議奏減課銀幾半調
山東築河堤幾千丈築臨清城十里為人淳厚通達
累仕六朝多著勞績景泰二年疏乞歸

人物志

李復觀名光安仁人性敏敦行以易第進士永樂初知福建邵武縣能以文學飭吏事不假鞭朴而民信服

同上

舒謨字愷政樂平人永樂進士知杞縣調旌德政尚慈祥廉敏不苛百姓愛慕繼以憂改定海定海鄙遠壓於兵鎮舊令苦掣肘謨律已處交一出於正武弁敬服之遂得竟所施廷覲選留都臺理刑拜監察御史

同上

馮誠字志誠浮梁人以童子舉秀才有葉懋者易而侮
之後誠巡按陝西懋以貢任平遼衛倉官失職論死
誠讞貸之時稱長者梟楚楚王舅張顯祖殺人王為
賂而誠拒之論如法其操守如此

安志

高峻字恒安餘干人宣德進士授監察御史巡按巴蜀
平潘松叛按畿內辨冤獄倭寇犯浙江勅峻以行且
假便宜卒成乃績官至浙江叅政

林志

按舊志以高峻為求樂庚戌進士者訛庚戌宣德

五年也白志據登科錄改正

葉昇字日新樂平人幼失怙事母惟謹母病篤刲股和糜以進明日母遂愈子培十歲喪母號慟欲死父紆解乃止求工對真刻母像置一龕晨夕告奠父卒復肖像合祀於堂自少至老哀慕如一日蓋父子稱孝云

府志

王逢字原夫樂平人幼穎異不凡比長師事野谷洪初初之學得於朱公遷公遷得之吳準軒準軒得之饒

雙峯道脈所自逢以心會焉乃厭科舉業研精道德性命之懿薦授富陽訓不就退歸鄉塾宣德三年復以明經辟召見堅辭不就職歸足跡不入城市毅然以斯道為己任著有言行志自書其廬曰松塢學者稱松塢先生

人物志

王弼字廷輔鄱陽人宣德進士正統間授戶科給事中歷兵科都給事累上疏言時政會歲饑請蠲逋負再三諄切得允陞順天府丞修山海居庸邊防有區畫

進應天府丞累疏乞歸卒於家

林志

何英字積中號梅谷鄱陽人性警敏不事詞章學於王松塢得饒雙峯黃勉齋之傳累薦不起建玉溪書院以納天下來學著有四書釋要詩經增釋易經發明

崇祀鄉賢祠

林志

胡居仁字叔心餘干人聞吳與弼講學崇仁徃從之遊絕意仕進其學以主忠信為先以求放心為要因以敬名齋端嚴凝重對妻子如嚴賓手置一冊詳書得

失用自程考已而築室山中四方來學者日衆皆告
之曰學以為已不求人知著有居業錄居仁性行淳
篤居喪骨立非杖不能起三年不入寢門與羅倫張
元禎友善數會於弋陽龜峯嘗言陳獻章學近禪悟
莊泉詩止豪曠此風既成為害不細又病儒者撰述
繁蕪謂朱子註參同契陰符經皆不作可也督學李
齡鍾成相繼聘主白鹿書院過饒城淮王請講易傳
待以賓師之禮是時吳與弼以學名於世受知朝廷

然學者或有間言居仁闇修自守布衣終其身人以
為薛瑄之後粹然一出於正居仁一人而已卒年五
十一萬歷十三年從祀孔廟追諡文敬

白志

黃梨洲曰敬齋以有主言靜中之涵養即白沙所
謂靜中養出端倪宜其同門冥契而先生必欲議
白沙為禪蓋先生近於狷白沙近於狂不必以此
而疑彼也

劉傑樂平人正統三年任義烏縣丞為政識大體設法

預備賑饑息虎患併糧區乞王忠文祭謚旱荒奏蠲糧稅上封事十條採行其九秩滿民詣闕代留人物

志

黃璧字廷玉浮梁人登鄉薦任紹興同知性好學剛而有制紹興志載其守潔政平民甚宜之秩滿去郡惟

圖書衣被而已

同上

汪琰字廷用樂平人正統進士由行人擢監察御史貴州蠻獠諸溪洞猖獗少保于謙謂非汪北城不可請

得琰按治與都御史王來等共經畫之貴州平代還
軍民遮道願留按浙江病瘳輒發粟賑貸發富民私
隣婦而殺其女獄無証累年有烏為冤怨聲琰廉之
即烏所止處得其屍論如法擢山東副使值濟南道
蝗輶車捕蝗平反無辜且上言山東為朝廷咽喉凡
徭役糧草皆宜停罷用甦民困以母喪歸貴州盜復
起朝議用琰即家起復之卒於道

同上

葉冕字拱辰鄱陽人正統進士授南京刑部主事擢知

松江府廉明公正鋤強植弱民畏而服之時連歲饑
饉冕悉力賑救賴以全活者甚衆府有澱山湖其半
屬崑山界湖堤壞彼此莫肯修冕槩視之為築萬餘
丈蘇人愧之秩滿陞山東叅政晉副都御史致仕

上

鄭冕字宜端樂平人正統進士拜監察御史適兩淮饑
冕至發倉廩賑貸招還流亡天順間總戎石亨怙寵
擅威福冕偕臺僚論其奸亨訴於上盡遷謫之臺諫

一空冕得衡山尹至則歛惠一邑務綏生民歷六年

亨敗始用薦者擢知衡州府以禱雨遘疾歿於官

同

上

劉濟字時用鄱陽人正統進士授兵部主事陞郎中改吏部孜孜以汲引為務惟恐遺才進左通政預知制

誥同上

余亢字拱辰德興人正統舉人歷事都察院考異材特授監察御史操法嚴謹彈劾無所顧避為臺長所擠

謫知寧海縣執法一如御史時以外艱去職

同上

童軒字士昂鄱陽人景泰進士授南吏科給事中英宗復辟上疏言弭盜安民數事切時弊改戶科給事中憲宗踐祚首上疏言帝王之治在先本而後末簿書刑名其末也優詔荅之四川盜起廷議軒才識足任馳至賊巢宣布朝廷恩威賊羅拜以降進都給事中明年賊復猖獗謫壽昌知縣六年擢雲南提學僉事召拜太常寺少卿進本寺卿以都察院右副都御史

提督松潘軍務疏言松茂戍守甚艱宜調兵設衛守
之四處要路各設倉以便轉輸凡八害三利條畫以
聞擢南京吏部侍郎署禮部尚書三疏懇求致仕所
著有清風亭藁枕肱集

林志

按童軒所著尚有海岳涓埃喻蜀藁邊錄等書

劉城字廷高鄱陽人自少磊落有大志景泰順天鄉薦
選授監察御史俵馬直隸山東河南巡按鳳陽陝西
督餉貴州雅著風裁陞福建副使上杭盜起詔起都

御史高明勅之高輿疾以兵事屬城城深入大捷梟渠魁散脅從請立巡司又擇其幼者充生員次充吏使漸染於化高備疏其績歷陞按察使廣西右布政使右副都御史巡撫河南

同上

戴琥字廷節浮梁人景泰鄉薦授監察御史劾罷巡江不職二重臣又疏論南京大臣考察僚屬任情取舍出知紹興府首濬范文正公清白泉以勵僚屬次第新郡邑學宮增祀鄉賢獨黜虞世南埋蘭亭石刻葺

會稽宋諸陵置典守洒掃水旱歲饑奏蠲民上供再
饑奏蠲三之一築堤數十萬丈捍海得田四萬餘畝
民稱戴公堤又築橫塘壩而斥鹵地多可田建柘林
等處七閘立石刻木示民時啓閉蓄洩去日民扳號
塞道擢廣西左叅政疾劇乞歸

紹興府志

戴珊字廷珍浮梁人父嘏由鄉舉官嘉興教授有學行
珊幼嗜學天順進士擢御史督南畿學政歷浙江按
察使福建布政使終任不攜一土物弘治二年擢右

副都御史撫治鄖陽蜀盜野王剛流劫竹山平利珊
討擒其魁入歷刑部左右侍郎與尚書何喬新彭韶
共事進南京刑部尚書召為左都御史考察京官珊
廉介不苟合給事中吳舜王蓋自疑見黜連疏詆吏
部尚書馬文升并言珊縱妻子納賄珊等乞罷帝慰
留之下舜蓋詔獄命文升珊即舉察事珊等言兩人
逆計當黜故先劾臣等今黜之彼必曰是挾私也苟
避不黜則負委任而使詐諛者得志帝命上兩人事

蹟皆黜之帝晚年召對大臣珊與劉大夏造膝宴見
尤數一日與大夏侍坐帝曰時當述職諸大臣皆杜
門如二卿者雖日見容何害袖出白金賚之曰少佐
而廉且屬勿廷謝曰恐為他人忌也珊以老疾數求
退帝語大夏曰朕以天下事付卿輩猶家人父子今
太平未兆何忍言歸大夏出以告珊珊泣曰臣死是
官矣帝既崩珊以新君嗣位不忍言去力疾視事疾
作卒於位贈太子太保諡恭簡

列卿錄

吳中字時中樂平人景泰進士授清流知縣改知東莞
才名藉甚都御史韓雍鎮兩廣時洞獠猖獗率兵征
勦中先期令四門出入者人截一袂實糗糧裹之軍
至人給一囊而去韓以為能因薦守廣州拊循一方
僚屬翕然嚮化繼改梧州治績如蒞廣州時擢貴州
叅政陞左布政

人物志

胡靖字汝寧德興人初名德盛英宗賜名靖第進士授
御史慷慨任事風裁凜然轉陝西僉事時值寇亂邊

務方殷靖措置嚴密境內寧謐為湖廣按察使陞山東布政使歷官三十年所至雖楮墨僅取充用俸祿自給外不留贏餘布袍蔬食家無積粟居無寧宇嘉靖間建祠祀之

人物志

趙哲字民彝餘干人天順己丑就試銓曹葉盛奇其策授衡州同知憂去改嘉興時楊繼宗作守哲寬以濟之嘉甚苦海潮多墊溺築堤捍之擢兩浙運同剡鹽弊更定三限法民便課亦足上疏乞歸

同上

嚴彪字弼中鄱陽人天順己卯鄉薦就訓歸安改建陽
擢縣願復領教職冢宰尹旻歎以為難陞山陰學諭
有兄弟爭訟者責以叛天性且引咎自責兄弟感悟
遂成友愛周生漳事繼母孝歲試當黜亟白督學因
以充貢由是士知激勸敦行病足致仕歸自謂母老
可就教職性淡可辭熱官足病可蚤引退號三可人
稱為三可先生

同上

黎福字天與樂平人天順進士授監察御史出知鎮江

改知寧國累官右副都御史撫治鄖陽以疾致仕福
居官必稱職其為御史數疏天下利病間及宮闈事
按真定貴戚有強占民田歷數御史不敢辨悉奪還
之按四川平反冤獄尤為川人所稱鎮江軍衛雜處
武人暴虐無所忌民素苦之及聞福來皆惴不敢犯
鄖陽節制三省首察文武吏才不當任者易置之流
民安業以南京兵部侍郎卒

林志


邱霽字時雍鄱陽人天順進士歷官蘇州知府幼穎悟

能詩文工懷素草法負才子名著有草堂集

人物志

辜顥字主敬安仁人天順進士授吏部主事遷兵部郎
中擢廣西叅政柳慶蠻獠雜處最稱難治推示誠信
卒皆率服年五十致仕

同上



江西通志卷八十九

欽定四庫全書

史部

江西通志卷

九十一

詳校官監察御史_臣范衷

檢討_臣德生覆勘

總校官知縣_臣楊懋珩

校對官中書_臣石鴻翥

謄錄監生_臣包文訓

欽定四庫全書

江西通志卷九十

人物

二十一

饒州府

四

明

程楷字正之樂平人性警敏為文尚奧古自成一家成

化丁未會元改翰林院庶吉士授編修預脩會典尋

卒

林志

張憲字廷式德興人成化進士授考功主事歷郎中凡十有四年廉慎公勤如一日陞山東左叅政行部所至興廢典釋冤繫陞浙江布政使閱庫藏主吏報羨銀若干封識表之積官工部右侍郎總理易州山廠止用公差例日廩五升省八郡常供之餽簿書關防宿蠹十去七八還莅部事會武宗即位諸邊告急戶部言鹽法久壞請遣重臣釐正遂兼都察院左僉都御史以行親歷諸場災瘴無所避事且就緒劉瑾專

權議革巡撫名還越二年改南京都察院陞南京禮部尚書瑾終惡其不附已月餘內批致仕

人物志

彭程字萬里鄱陽人成化進士授御史巡視京城降人雜處多為盜事發則投戚里奄豎為窟穴程每先機制之有發輒得巡鹽兩浙代還巡視光祿上疏言臣適見光祿造皇壇器皇壇者先帝修齋行法之所陛下即位此類廢斥盡何復有皇壇煩製器頃李孜省繼曉輩倡邪說而先帝篤信之者意在遠希福壽也

今二人已伏重辟則禍患之來二人尚不能自免豈能福壽他人請治所司逢迎罪時帝無皇壇造器之命特光祿姑為備帝得程奏大怒以為暴揚先帝過失立下錦衣獄付程刑部定罪尚書彭韶等擬贖杖還職帝欲置之死命擊之韶等復疏救程子尚三上章乞代父死不聽並家屬戍邊程母李氏年老無他子叩闕乞留侍養不許子尚隨父戍所遂舉廣西鄉試明年帝念程母老放還其後劉瑾亂政追論程巡

鹽時稍虧額課勒其家償程死久矣止遺一孫女罄
產不足則竝女鬻之行道皆為流涕

白志

干準字世範安仁人領鄉舉歷長沙衛輝判有惠及民
嘗吞蝗蝗悉死民得有秋遷松江同知罹火災拜禱
遂息部使者薦之秩滿乞致仕陞知本府俾仍還蒞
事三日去時人高之

人物志

舒清字本直德興人成化進士授工部主事裁抑浮費
中貴憾之抽分浙江榷政為民築堤以禦水患號舒

公堤尋遷負外郎奉差適徽府於均州掘地得錢十八萬緡奏入公帑自營繕郎中陞河南叅議屬河泛城灌巡守諸臣咸求舟自濟清獨取舟焚之衆始一力防塞二日水降城卒無虞歲饑請邀運米百萬分給一省全活甚衆尋陞四川叅政立遞減法以便民轉廣西左布政先是猺獞叛服不常清單舸諭以恩信皆懾伏無敢動駕帖取庫藏銅鼓槌諸物清以節用愛人疏進又取古琴諸物清以不貴異物疏進田州

土官承襲具謝金斥出備軍餉民蠻懷附尋以疾乞休
歷仕三十餘年清約如寒素著有直菴集行世

林志

孫弁字文冕浮梁人成化進士知龍游擢御史累疏論
天下大計風裁凜然按廣東南畿遷浙江僉事弁初
出龍游有豪書里門云虎去山猶在弁續曰山深虎
又來後果以僉事至邑剪除殆盡

人物志

祝瀾字有本德興人成化進士授兵科給事中立朝剛
直敢言初論彗星之變繼論尚書王恢李秉都御史

韓雍高明皆負天下望不宜閒處言甚剴切嘗夜草奏指摘宮闈燈忽爆滅至再家人慮不測勸瀾止瀾艱然竟持奏上之廷杖得不死謫安州判尋遷國子監丞上廟祀議以聖賢像宜從明初定制祀木主顏無繇曾點孔鯉以父列於廡顏淵曾參孔伋以子坐於殿尊卑失倫殊為未當先師父母未沾褒封似為缺典請褒封叔梁紇仍于大成殿東別立一廟祀之以顏無繇曾點孔鯉配享左右并罷荀況公伯寮從

祀通行天下郡學遵守疏上下禮部議不合再謫雲
南廣西府經歷瀾慷慨尚氣節不以死生禍福為意
其後廟議皆已採行瀾為人大節為諸生時聘舒
氏女亡何女雙盲其父母欲改適瀾不可竟娶瞽女
與之終身

林志

程廷珙字獻之浮梁人性孝友居母喪三年不御酒肉
成化進士授南京吏部主事進郎中陞福建叅議榜
禁不法三十餘事開渠建陽以利灌溉福寧疫厲大

作力賑之由廣西叅政進布政使時蠻寇甚猖獗渠
魁黃鑑成等勦擒殆盡又東關吞併徃諭禍福隨解
土官爭長以法定之母敢議謝以金二甕卻不受踰
年竟卒於粵

林志

按程廷珙所著有貞菴集十二卷廣西省志八卷
孫需字孚吉原貞之孫成化進士為常州府推官擢南
京御史偕同官劾僧繼曉忤旨予杖出為四川副使
弘治中累官右副都御史巡撫河南歲凶汴河齧城

需募民築堤堤成饑者亦濟鎮守中官劉瑯貪橫奸民赴瑯訟需論之成瑯跪請執不聽瑯恨次骨會大臣子橫於鄉需裁約之瑯與謀改需撫陝西寇大入寧夏用楊一清代需還以故官撫治鄖陽撫輯流民占籍者數萬正德二年召為南京兵部右侍郎就擢禮部尚書劉瑾惡需追論撫河南時事罰輸米於邊勒令致仕瑾既誅起需代張憲為南京工部尚書就改刑吏二部十三年引年乞休賜勅乘傳去嘉靖初

卒謚清簡需在蜀時族弟入其境檄有司械送歸人
以此議其薄然需故以廉約稱

白志

按孫需所著有冰壁稟奏議都御史盛應期稱其
歷仕三朝名節無玷云

虞訥樂平人五世同居有家範人無間言事聞旌之

林

志

戴璉字廷獻浮梁人力學希古登成化丙戌科人稱為
五經進士授大理評事未究厥施而卒所著有知非

集

同上

潘葵字日臣浮梁人幼孤有志性理之學事母孝廬墓三年選補邑庠苦志力行始終不渝所著有皇極數傳洪範本傳易思得錄歷法世論深衣說石室集諸書

同上

蘇章字文簡餘干人成化進士授兵部主事以星變言事謫姚安通判陞松江同知後知延平府案上大書忍字以自警又建寶章閣創道南祠合祀楊羅李三

大儒漳平寇作躬劄永安設謀勦捕賊不敢窺擢浙

江參政嬰風疾不起

人物志

按蘇章于憲宗朝上疏請誅李孜省僧繼曉因而得罪事見李俊傳中

彭福字綏之樂平人成化進士知泰州歲例泰解邊馬五十三匹途多斃解者毀家償之又歲輸軍豆苦於遠運福皆奏免之守備昌姓者嗾家奴倚勢支鹽福命拽下獄奏劾違制遂落昌職泰遂稱治福性剛介

遇事敢為權幸私干壁立不少動以故得謗引年乞
休歸之明年泰民赴京奏起之不報

府志

祝徑字直夫德興人登進士初授給事兩奉使藩餽遺
不受疏阻中貴李廣之乞地及巨璫李興之再入劾
罷漕運總督張緯奏定勲臣侯伯祿之常額以言事
下獄尋釋為河南叅政查巨盈庫藏掘發地中瘞銀
舊無稽查者一一籍之官督建汝王府第內侍貪酷
害民徑緝之以法修防黃河穿地築堤通徐州呂梁

二洪有功卒于官

人物志

董旻字子仁樂平人成化進士擢兵科給事中旻風節自礪時萬太妃擅寵昭德宮率諸垣指陳不報偕御史林誠連章終論之詔撻於闕廷幾死起益振烈指論冢宰姚一夔內閣商輅無所貸戊戌琉球中山王請封為正使贐金固卻之不得歸以聞詔使之受擢吏科都給事中憲皇帝久虛主鬯時孝宗已在潛邸人畏昭德莫敢以為言會星變因倡論始正儲副然

危機已峙於茲以侍吏誣謫知雲南之石城舊雲南
雜蠻獠動以戈戟逞旻說以禮義翕然從教孝宗即
位起擢雲左叅議以父憂改四川

同上

程勇字文憲樂平人以賢良方正應詔擢山東御史妖
婦唐賽兒聚衆作亂命勇監軍有洗蕩功奏聞隨擢
僉都御史青州立生祠祀之

同上

張吉字克修餘干人成化進士除工部主事時李孜省
僧繼曉以左道進會星變吉上疏顯劾二人罪其黨

欲撫吉過不可得諷吏部尚書尹旻謫吉景東通判
土官陶洪遣子榮來學民漸知化遷肇慶同知築堤
防水亘三縣又為竇以殺衝決民德之號張公隄遷
梧州知府崇正學飭文廟樂舞政教並行陞廣西兵
備副使以府江東西二賊相為犄角而東賊慄悍尤
甚遂併力於東數月之間斬獲甚衆西賊聞之亦皆
自戢府江以寧後考績入京有更張其法者賊復乘
時而起鎮巡以聞詔促吉還任在府江七年武廟御

極邊方侵擾陳便宜策以貴州布政使養疾家居卒
著有三朝奏議陸學訂疑貞觀上斷諸集子俅進士

御史有父風

林志

按吉所著尚有古城集六卷

余祐字子積鄱陽人年十九師事胡居仁居仁以女妻
之弘治進士為南京刑部員外郎以事忤劉瑾落職
瑾誅起為福州知府鎮守太監市物不予直民羣訴
於祐慰遣之云將列狀上聞鎮守懼稍戢然志甚遣

人入京告其黨曰不去余祐鎮守不得自遂也然祐素廉撫拾竟無所得未幾遷山東副使父憂服闋補徐州兵備副使中官王敬進鮮多挾商船與知州樊準指揮王良詒良發其違禁物敬懼詣祐求解祐不聽敬誣奏準等歐已遂并逮祐謫南寧府同知稍遷韶州知府投劾去嘉靖初歷遷雲南布政使以太僕卿召未行改吏部右侍郎祐已先卒

列卿錄

黃梨洲曰先生之學墨守敬齋在獄中著性書三

卷謂程朱教人以誠敬為入門乃其論性則兼理氣而言深闢性即理也之說蓋分理與氣截然為二并朱子之意而失之矣

李曉字未夫浮梁人天資高敏早歲放浪不羈年近四十赴省試聞有講學會往赴一聽不覺汗下沾背歸遂翻然自勵旋與鄱陽史汝寧遊史嚴毅刻苦踏實為學者也曉謹嚴中有超超自得之趣郡守陳吾德延為諸生講當江陵禁學之日曉竟不輟講以没人

物志

劉璉字廷美鄱陽人弘治進士授刑部主事陞員外郎
中每疑獄或廷尉所駁惟璉覆確陞柳州知府時猺
獠肆掠都御史應城金率士校討之多璉畫計旣而
魚峯賊周鑒煽亂璉率輕甲掩擊值後軍不繼遇害

同上

詹陵字良卿樂平人弘治鄉薦任鄭州學正後改瀘州
陞知寧遠縣甫三月政教大張偶感疾因思朱晦翁

沒沒功名語毅然乞休家居益邃於學嘗以主敬為

先

同上

史梓芳字景賢鄱陽人孕十五月而生性穎敏博通經史與劉應麟祝世祿同硯席皆以國士期之生平湛心理學授徒必以敦行為先嘗曰士苟能遠聲利薄嗜欲便是真實學問作三畏箴四知銘以自警

同上

王良臣字汝忠德興人戊午舉於鄉時懷玉書院初闢鄒東廓錢緒山後先主盟良臣負笈從之屢上春官

因念母春秋高無意仕進朝夕承顏丁丑以母命謁
選得景陵學士林以為得師署邑篆素礪水蘖當路
廉其賢交章薦之竟不起

同上

彭應奎字勉文樂平人弘治乙卯解元穎敏絕倫著作
甚多有白涯文集行世

同上

劉麟字元瑞本安仁人世為南京廣洋衛副千戶與顧
璘徐禎卿稱三才子弘治進士除刑部主事進員外
郎錄囚畿內平反三百九十餘人正德初進郎中出

為紹興知府劉瑾銜麟除官不謁謝甫五月撫前錄
囚細故罷為民士民為建小劉祠以配漢劉寵因寓
湖州瑾誅起補陝西左參政督糧儲尋遷雲南按察
使謝病歸嘉靖初召拜太僕卿進右副都御史巡撫
保定六府再引疾歸起大理卿拜工部尚書侍衛軍
不給衣履錦衣帥駱安援紅盔軍例以請麟執不可
詔量給銀自製後五載一給為常四司財物悉貯後
堂大庫司官出納多侵漁麟請特除一郎官主之賜

名節慎庫已上節財十四事汰內府諸監局冒破錢
中貴大恨會帝納諫宮言停中外雜派工役麟牒停
浙江蘇松織造而上供袍服在停中中官吳勲以為
言遂勒致仕家居三十餘年晚好樓居力不能構懸
籃輿於梁曲臥其中名曰神樓文徵明繪圖遺之年
八十七卒贈太子少保謚清惠

列卿錄

程誥字欽之樂平人弘治進士授刑部主事數決疑獄
改工部督臨清關閘尋擢本司員外郎轉虞衡都水

時逆瑾專恣諫垣結舌誥與尹之任連名疏劾被瑾
中傷出知廣之雷州比至郡海潮溢發蕩析民居捐
俸賑濟請免田租之半民賴以蘇

人物志

范憲樂平人以身行舉授東莞丞性沉毅寡言笑在事
八年民多戴之土孽黃循等陰黨叛賊來攻邑城憲
率兵民禦之衆寡不敵死焉

廣東名宦志

胡奎鄱陽舉人任黃州知府凡七年政尚寬厚好為民
興利務在富之勤於勸農暇則訓校諸生多興起者

湖廣名宦志

葉綬字叔章上虞人祖砥知饒州府綬遂占籍鄱陽補
郡學弟子負中江西鄉試授應州學正綬儀觀清癯
學問該博尤善古篆

府志

按葉綬前志見寓賢今改入

張蟾鄱陽人為忠州守廉介剛直時中官採木蜀中大
肆貪暴沿江諸郡為之騷動蟾擒其僕從將劾之中
官懼請謝引去

四川名宦志

祝祥字廷瑞本姓王浮梁人官御史時因言事忤權貴
被謫後知靜寧州有治才歷任九載勸農興學政績

顯著陞汝寧知府

陝西名宦志

趙琥餘干人由舉人教諭閬中孝弟謙恭勤慎清介詩
文清雅嘗為蜀志總裁三典文衡所拔多知名士撫
臣章薦在道而卒著有綵舟聯韻圭齋文集解峯文

稿藏於家

四川名宦志

余縉鄱陽人進士正德中巡按四川逐貪污舉廢墜當

逆瑾擅權時獨持風裁如縑者不多見云

同上

方選浮梁人正德進士知四會縣不以家衆自隨清介如一商人河稅錢里甲直日收徵常例皆革之為政存大體節用裕民後遷秩去

廣東名宦志

桂華字子朴安仁人正德癸酉鄉薦姚源盜起華請以賑濟粟募民築城為捍禦計會寧藩蓄逆謀陰使其腹心兵備王綸羅致華使助已華時居母喪綸旬日三奠其母靈華揣知其情議論必依忠孝綸卒不敢

出一語而去天性孝友居喪不用浮屠有古山先生

集二十卷行世

人物志

張欒字叔喬德興人正德進士授刑部主事會瑾用事
左遷鳳陽教授瑾敗起歸德同知署開封府事築城
禦寇有功以薦知柳州府陞南京刑部員外所著有

太極圖解

費文憲摘藁

盧瓊字獻卿浮梁人正德進士授固始令固始方中寇
瓊至而撫集之飭政興材百廢具舉擢監察御史世

宗入瓊疏爭大禮其略曰陛下在興國則為興獻王
嗣繼大統則為孝宗後雖長子不得為人後不能斷
之於先而今可改乎上怒廷杖幾斃謫戍遼東十年
乃赦歸其後臺省交章論薦報可瓊固辭年八十一

卒贈光祿卿

人物志

張鉞字文輔安仁人正德進士初宰遂昌江西姚源盜
發四境騷動捧檄率兵進討寇遁擢御史巡按廣西
露章劾逆瑾直氣不磨巡撫雲貴邊務調停居官四

十餘年以清廉著官至工部侍郎會九廟災自陳致

仕

同上

余廷瓚字伯獻鄱陽人第進士官行人司司副正德己卯武宗南巡廷瓚條上十不可皆人所不敢言者疏入上震怒杖於廷下獄旣而釋之卒於外嘉靖初遣官諭祭有追念忠誠曷勝悼惜之語

林志

按武宗南巡一時疏諫者舒修撰國裳詞最激烈余廷讚疏反覆千餘言其剴切不下於舒人物志

載其全疏茲不具錄

王由道字汝充樂平人正德丁卯鄉薦警敏辨博在京

醉罵權閹劉瑾被斥著有古狂文集

人物志

舒林字叔喬樂平人正德進士拜御史侃直不撓慨然有澄清志撫臣陶琰軍政不肅抗疏論之宦成清苦

如寒微詩文高古士林崇之

府志

李榕字全年鄱陽人好蓄書罷同安教諭歸構一樓宅後俯瞰東湖扁曰玩鷗自題其柱云近湖不與鷗爭

水到岸方知我有家徜徉其間讀書澆花老而不倦

卒年九十四

人物志

黎澄字本靜樂平人嘉靖進士選庶常與修武宗實錄
改禮科給事中督學廣西建學造士轉參議家居力

敦孝友沉酣經史著有春草堂集

同上

余錡字子振德興人嘉靖進士授推官徵拜山西道御
史巡居庸關劾罷太監劉岑姚正按湖廣發楚府世
子諸不法事權貴忌之謫宿州判歷官刑部郎陞守

保定府疏陳四事曰精選官軍增築城垣招募土兵
取回驛站歲饑捐俸買稻助賑為富民倡再守衢州

卒於官

同上

余曠字德明樂平人嘉靖進士授行人擢兵科給事中
時銓部許讚挾權市私曠連章劾讚及選司李棟竝
罷去又直疏邊方撫臣龍大有樊繼祖等貪冒失機
之罪薦宿望名臣曾銑韓邦奇朝論壯之以直忤時
謫浙江布政司都事尋擢建陽尹治功卓異累遷按

察司僉事會安溪九龍洞劇盜嘯聚劫戮滋蔓曠調
度官民兵進逼諸險出奇拏擊賊魁陳日輝就擒閩
人士為勒平寇碑頌功德官至副使

豫章書

曹天憲字恒卿浮梁人嘉靖進士知新昌剛廉不習脂
韋躬先節儉禁絕饋遺燕飲裁省夫役每延儒生至
寢室蔬食相對蕭然如寒士著賦役成規勒之石歲
大旱布袍芒履烈日中出舍僧寺凡閱月為文責城
隍至欲自焚以謝百姓已而雨決歲登民皆德之擢

兵部職方主事從侍郎范璉巡邊凡衝隘要塞躬履
畫圖至古北口見其地陡絕險扼而守備單弱請亟
更立重鎮尋遷武定兵備再遷四川參議以抗直忤

御史議調歸

同上

吳宗吉浮梁人弱冠鄉薦令清河值河泗水患民多逃
竄給牛種招徠復業遷蘇州同知九年遷兩浙運同
陞貴州黎平知府入覲道卒歷官三十餘年不為子
孫田宅計黎平後守乘其死以庫藏不明陷之移文

拘提其子巡按使者係吳人素識其清介歎曰此公
九載蘇州止飲蘇水其可誣乎疏豁免之

府志

方逢堯字景雍樂平人嘉靖甲午選貢歷徐聞靈山二
縣令所至多惠政在徐聞七年征黎有方畧民賴以
安時盜劫罷官於途蔓誣三邑逢堯方覲回廉其枉
力為辨白緝真盜并所掠以報當道悉改成案活冤
獄百餘人尋擢南安知州

同上

祝世祿字無功德興人嘉靖甲子舉於鄉諭黃陂以學

為教已丑成進士令休寧有兄弟訟十餘年不解者
世祿曰此未可曲直折也乃係以銀鐺而坐之獄令
朝夕同起臥久之遂兄弟如初及選南吏垣礦稅起
留都兩廠監駐徽寧燄張甚欲令二千石以下庭謁
之世祿取儀註刪定為平交禮九載考滿陞南京尚
寶卿京察降調卒世祿工詩善草書談理獨抒心得
人人解頤故講學之士尤思之

人物志

高美字文中樂平人嘉靖鄉薦知濱州州瀕海地一遇

歲歉民輒流移美即隙地建義倉以救荒築漏澤園以掩骼循行以勸農校士練兵政績茂著上特賜劄

嘉獎陞刑部郎中

同上

周榮字勉仁樂平人少警慧博學邃易肯綮嘉靖進士官行人奉詔督江南三省軍器廩餼外一無所擾轉工部主事時冬官司匠徒每苦中貴凌制榮不屈權勢卒於官

同上

周禮字時叙樂平人嘉靖進士授工部主事廉慎忠勤

歷官二十年如一日擢福建參政至閩倭寇竊發奉
命專巡海道設方畧以禦要害地方得寧

府志

章書字弘載餘千人嘉靖進士授南京吏部主事歷員
外郎中陞四川順慶知府時大饑講求荒政民無遷
徙屬邑盜起多方撫綏撫按上其事賜金幣超陞四
川參政改廣西分守勦平山寇民賴以寧以廣西按
察使致仕

同上

胡永和字履初萬年人性醇謹博學沉潛領戊午鄉薦

授廣東肇慶司李廉介明允民懷其德威卒於官鬻
婢僕以資輿櫬鄉里競傳其賢云

同上

桂萼安仁進士嘉靖初令成安下車即詢問風俗知民
間無蓄積而尚奢靡於是覈田畝減供需汰夫役釐
弊剔蠹期於便民又闢小學設師儒立科條以端蒙
養每戒民勿輕訟鄰邑有疑獄久不決者多來質成
片語折之兩造俱服期年擢南刑部主事累官大學

士謚文襄成安人祀於仰功廟

直隸通志

揅時賢浮梁人進士嘉靖間知東明縣廉平公慎首進猾吏清三省賊巢殲其渠魁課農導士一方稱樂利

焉卒祀名宦

同上

戴時雍字逢堯浮梁人嘉靖進士知雲南廣西府改築磚城約已省刑勸農課士民懷其德立祠祀之

雲南

名宦志

胡鐸鄱陽人嘉靖間知綦江實心愛民催科不擾一錢不入私囊卒於任貧莫能歸喪殯於城南士民哀之

四川通志

李信中浮梁人三歲孤母與嬸黃氏忤因事誣以奸母不能白縊死信中年十二知之泣誓母墓而行傭抵京師訴於朝上嘉嘆論黃死欲授之官信中辭曰乞歸報母上手摩其頂曰人家乃有此兒取黃帛親為裹髮資之歸終身不冠櫛

安志

蔡天祥字君瑞餘干人事母孝一日母疾思食鵲鴉天祥求之莽中得兩翼母夢神人語之曰汝子孝天與

汝九其後母年增九歲

同上

按安志鄱陽鄧文煥章全應善劉彥清李岐史仲偉朱厚鑣王永年樂平程仕簡陶慶黎士望程顯夏子羽浮梁王珊李瓊玉蔡文斌安仁倪蒼倪旺皆有孝義傳

舒鰲字子化德興人嘉靖進士授仁和知縣杭例舊有公費千金鰲盡革之入覲無資遣力回家稱貸冢宰楊公稱其治行為第一隨擢御史巡按湖廣

同上

舒春芳字景仁鄱陽人嘉靖進士授南刑部主事丁內
外艱服闋補刑部以疾乞歸杜門謝客授徒芝山寺
告滿仍補原官署員外郎擢福建僉事備兵建寧連
禦海倭山寇底靖一方暇日進諸生講析考亭西山
之學風其鄉人刊示東萊官箴以厲屬吏參政湖廣
值景王之國攝綜供億事集費省陞貴州提學副使
春芳天性醇篤口無妄言其學師法薛河東反身懋
求切問近取不為空談所至以學為政

人物志

史桂芳字景實號惺堂鄱陽人嘉靖進士起家歙縣令徵為南京刑部主事晉郎中出知延平府再補汝寧遷兩浙鹽運使以歸先是嶺表鄧德昌白沙弟子也以其學授傅明應桂芳讀書鹿洞傳一見奇之手書古格言以勗桂芳懼然嚮學之意自此始其後交於羅近溪耿天臺在歙又與錢同文為寮講於學者曰力天臺嘗曰平生得三益友皆良藥也胡廬山為正氣散羅近溪為越鞠丸史惺堂為排毒散桂芳在汝

寧與諸生論學諸生或謁歸請益即輟案牘對之刺
刺不休談畢珍重曰慎無弁髦吾言也激發屬吏言
辭慷慨遂平令故有貪名聞之流涕翻然改行郡有
孝女不嫁養父桂芳躬拜其廬民俗為之一變其守
延平七日憂去而盡革從前無名之費

明儒學案

程良字明輔樂平人嘉靖進士任仁和知縣審徭編却
靡費識王柏之文於里胥中免役就學隨登第富民
張洪納徭銀晚出銀山寺偶有鬻桑葉者斃於盜地

里以訟洪良據理白洪寃獲真犯於他所其明察多

類此人物志

吳汝新字勉之安仁人舉於鄉進學南雍授德慶州守
單車之官德慶古康州地猺獞雜處剽劫為患前此
易五守卒不能治汝新至諭以禍福狂逞如故乃練
兵設伏覆其巢而滅之一州以寧親老力請終養歸
年九十猶好學不倦

同上

王址鄱陽人幼嗜書史能詩事母孝慷慨負氣節嘉靖

間試武舉第一守備撫建時流賊自閩向建之新城
址提所部兵往值驍騎衝鋒址彎弓一發輒斃賊勢
少却亟招兵掩殺賊復振衆寡不敵址猶手刃數人
獨持矛轉戰竟日力竭援絕被獲罵賊不屈遇害

上

桂秀字子實餘干人邑學生奇傑有學識姚源賊每發
人墳墓秀憤其祖墓為所發率子弟倡義兵攻之與
賊戰於回跋奮勇陷陣父子及門人俞相等俱死

府

志

吳祚字天錫餘干人由吏員授陽朔典史致仕姚源賊猖獗叅政董朴以祚在陽朔從征賀縣賊有功檄領兵三千進攻梁山時天大霧營柵火起官兵大敗祚力戰斬十三人而死賊平贈祚承德郎蔭其子

同上

周輅字乘之安仁人質直敦厚忠孝出於天性以貢授滄州訓致仕家居羣賊掩至抱之擁上馬欲以為謀主輅厲聲曰我讀聖賢書食君上祿豈肯與鼠賊處

耶賊百計誘之罵愈厲遂遇害

安志

程嘉行字公敏樂平人學有淵源為文根極理要嘉靖進士擢禮部郎中朝廷儀制皆出其手著有納菴

集人物志

朱繼忠字以誠樂平人嘉靖進士官至通政司居鄉三十年絕請託著有小川集

同上

章世禎字克昌餘干人嘉靖舉人初任武陵以卓異擢知德州未幾以事移判徐州尋起六合令以治行第

一復知徐州治河奏功晉秩奉直大夫致仕

同上

汪柏字廷節浮梁人嘉靖進士為大理評事遷光祿寺丞宰相夏言以文章才品推重之出為廣東海道副使海上有巨寇何姓者為一方害捕擒之歷浙江布政致仕柏所至有風裁淡於嗜慾俸積盡以均之昆弟著有青峯存集

同上

關文振字道充浮梁人博綜文詞尤長於詩以歲貢教授嚴州徵脩福寧州志及寧德縣志所著有詩話文

話等書五十餘種

同上

金達字德孚浮梁人嘉靖鄉薦丙辰冠南宮廷對第一人諸所撰作雄偉典麗下筆千言立就後以司業致仕著有星橋等集

安志

姜金和字節之文詞博雅嘉靖進士廷試第三授翰林編修陞修撰時分宜秉政鄉人競趨之金和在史局淡如也歷春坊諭德南國學大司成疾作予告卒於家

同上

孫曉字東白德興人恬退嗜學補邑庠以父尚書清簡
公蔭入國學或諷之仕荅曰父以清白仕子以清白
隱固不可乎所著有竹坡漫稿讀史尚論西銘蠡見

過庭錄

同上

陳文衡字惟平鄱陽人隆慶進士授仁和知縣陞刑部
主事改監察御史巡按宣大時代藩奪嫡事發或為
賂庇文衡執法不少貸會御史劉臺劾江陵被逮文
衡大為歎息外調廬州推官江陵敗由南京吏部郎

中陞廣東副使備兵羅定歷陞湖廣叅政山東按察

使廣西右布政使

同上

劉應麒字道徵鄱陽人隆慶進士授禮部主事富宗人重貲求繼親藩應麒執不可當事者銜之出為督學廣東會沙汰例起應麒格不行以疾告致仕三載起廣西督學陞四川叅政遷湖廣臬長浙江左右轄陞應天巡撫遂乞終養起南大理卿再起工部侍郎俱未赴轉兵部侍郎命下先旬日卒應麒居官貞亮公

忠有大節所至以清名

人物志

李頤字惟貞餘干人隆慶進士授中書舍人萬厯初擢御史清軍湖廣廣西請免土民遠戍祇充傍近衛所軍忤張居正出為湖州知府遷蘇松兵備副使湖廣按察使鄖陽兵變知府沈鈇且得罪頤為白其冤而密殲首亂者以母喪歸起故官莅陝西進河南右布政使擢右僉都御史巡撫順天進兵部右侍郎伯牙入寇督將士敗之羅文谷進左侍郎久之進右都御

史在鎮十年威望大著中使憚頤廉正畿民少安二十九年以工部右侍郎代劉東星管理河道議上築決口下疏故道為經久計甫兩月以勞卒贈兵部尚

書白志

嚴而泰字師孔鄱陽人弱冠領鄉薦授彝陵學正薦入南雍助教能以師道自重服士心陞潁州守治行著聞卒於官結髮束修迄於彊仕粹然一節鄉評重之人物志

王守勝字以敬德興人從錢緒山遊聞陽明先生之學萬厯己卯領賢書時年六十一授貴池教諭隨轉紹興教授俱以古道訓士擢揚州倅署通州篆政稱廉

平安志

吳榕字子充安仁人萬厯癸酉鄉薦初授宿寧學博以成就人才為己任有王九叙者以童年應役榕從傭中特識之為請於令得免役且飲食教誨之後成進士為名柱史秩滿遷貴池令改調房山邑近畿輔多

貴戚中宦侵奪民產為患者數十年有御史某者檄
民據實陳訴許以疏聞而惡璫煽先發之毒反噬取
旨逮富民李當賢數輩誣其侵影皇莊緹騎暴悍且
侵辱長吏榕忿激為民請命由是忤中貴遂以病免
同上

蔡毅中字弘甫萬年人萬厯進士由翰林院侍讀進講
經筵善於輔導克成儲德歷國子監祭酒纂修國史
方魏璫勢熾獨抗疏彈劾罷歸卒諡文莊

府志

陳大綬字長卿浮梁人萬厯進士授涇縣令止璫開礦
邑賴以寧陞工部主事調兵部職方司郎中出督學
兩浙晉備兵常鎮尋移閩海遂告養歸里依依子舍
者十餘載特起尚寶卿轉太僕卿

人物志

方應庚字長卿樂平人萬厯進士授河南鞏縣令值歲
饑民鬻男女自活每捐俸贖之調廬州合肥汰冗平
差修學校築圩塘邑有厲疫請以身代飛蝗不入境
入覲授禮部主客清吏司主事以母病告養歸

同上

黃龍光字二為浮梁人萬厯進士授水部郎督兩宮大工以節省忤中官時六科廊燬奸璫中傷謫黔及召還家居二十餘年淹貫經史及當代典故天啓元年起復兵部武選司轉尚寶陞太僕正卿皆著成績歷右通政司建言停刑以培國祚拂璫意羅織遣戍偏沅飄然就道璫敗詔復原官

同上

按龍光所著有黔遊草二卷

胡舜肩字明祚餘干人萬厯進士質美好學名節自勵

為本邑鑄鐵斛胥役不得意為增減初任桐鄉有政績歷任大理寺評事刑禮二部郎中轉福建僉事

同

上

按胡舜肩所著有春秋解宗雅堂集

陳之可字汝時鄱陽人父志昂事親以孝聞之可童年母卒哀毀成羸疾初婚痛不及母命不忍成婚即室內為母位哭奠夜深跪哭不起遂昏眩卧地至曉後父歿不御酒肉不入內室者三年竟以羸疾卒邑里

重之同上

史書昌字二昌鄱陽人資性穎異幼即以古人自期見人所為制義歎曰四子之書皆求仁之學吾儒性命之要也寧區區咕嗶以干祿仕乎遂閉戶窮經性至孝年十四諸昆析居書昌獨承顏膝下頤志愉愉孺慕終身為常曰貧者士之常減一分嗜欲便增一分天理其平生究理明信道篤大率如此

同上

洪世弼字汝賢樂平人萬厯己卯鄉薦知萬泉縣縣苦

劇盜立擒獲以除害民病水窪建堤橋以興利陞禹
州知州時黃河淤塞下州縣濬治躬率河夫一千刻
期告成部使者上其事於朝調任蘄州卒

安志

李日修字初吉浮梁人萬厯己酉鄉薦歷官工部主政
督熹宗山陵節省浮濫貂璫不敢少私陞叙州知府
釐奸剔弊執法不回擢雲南臬副攬轡行部風紀肅
然

安志

閔址字蠡襟鄱陽人萬厯歲貢任興化訓導遷南平令

憂歸服闋補沐陽縣抵任值運河淤塞上發帑金八十萬遣重臣督理專責印官疏之址相度經營勞傷致疾閱歲河工告成擢高郵知州命甫下而卒

同上

舒邦儒字真卿餘干人萬厯進士少以德行重於鄉事繼母以孝聞後因艱子嗣買妾得淮揚孫氏女臨去母不忍別邦儒太息曰吾求男而使人以女病乎遂厚贈金而遣之初任徽州司李刑獄平允大司徒殷歛人也歛土故籍絲稅會下清丈之令殷止均五邑

時構爭力甚邦儒正色裁之事得息陞南刑部主事
持法如初

同上

胡繼美字中在鄱陽人萬厯進士初任東莞令廉潔自
持邑有牛稅魚稅民間苦之繼美裁他稅以抵二稅
積困遂甦補閩之漳浦擢驗封主事歷考功稽勲文
選三司郎中出典河南鄉試當時柄璫戚畹聲勢張
甚卒能履險而不懼於咎人服其智後乞假歸省踰
年起大理左丞

同上

朱一桂字廷萼浮梁人萬厯進士授婺源知縣行取兵科給事中轉湖廣江防叅議積官刑部右侍郎南都察院右都御史冠帶閒住崇禎初詔復原官未任隨

卒賜祭葬

府志

程再伊字連叔鄱陽人萬厯進士授浙江蕭山令邑有北海塘腴田萬頃每為潮汐所漂沒再伊相度形勢募民築堤越歲告成遂享灌溉之利秩滿晉儀曹郎出補漳南監司未幾告歸人物志

陳嘉訓字彛仲鄱陽人萬厯進士初授行人出為南吏科裁正上供錢糧聿清耗蠹中貴人憚之時青宮遷延未定屢疏請立光宗及論罷閩越兩巡撫與有司之不肖者先是科員命下例當面閣時相溫顏留與語嘉訓不為動辭出至南中不踰年竟論罷之嘉訓亦以是謫歸

人物志

廉靖字安卿鄱陽人萬厯舉人知肥鄉縣蒞任三載遂乞致仕邑有劉生去非者初以誣陷獄靖察其寃得

釋劉尋登第代巡西江臨饒造廬奉三百金為壽力
辭弗獲曰此德金也因置義田以供祭祀及資子弟
之讀書而貧者嘗一夕坐館中見火光燭地呼主人
至掘地得金主人請分之靖曰我寒士弗敢當汝悉
持去靖即以是年舉於鄉後令肥歸檢其俸適與前
金數符居林下講學不輟卒年九十祀於鄉同上
江和字不流鄱陽人萬厯丁未魁南宮初任刑曹郎欽
恤關陝多所平反且以江右官徵官解法易秦民累

適甘肅告警指授方畧賴以無虞有二帥以千金餽
俱却之出守成都註上考擢滇南學政東粵糧儲晉
福建按察使得貤封三世喜曰吾遂初矣遂致仕歸
及璫禍作獨得翱翔寥廓其知微如此 安志

許大忠字元甫鄱陽人生而清癯博覽羣書為諸生有
聲後遂厭習舉子業遍訪名賢務求正學平生積貲
五十金盡出以付司會者為景仁堂講學費太守張
靜涵與為布衣交每微行造訪而元甫雖公事亦未

嘗一詣公庭人物志

閔翼明字襄甫鄱陽人邑庠生天性孝友父母早歿結廬墓側獨居十年餘生平潛心理學與同邑江不流許元甫講學寒暑不輟府志

張國鑰字啓之浮梁人家徒四壁萬厯甲午舉於鄉聞捷時即往墓拜哭痛父之不及見也事母色養備至以孝聞選就教職青壇首宿處之裕如惟以忠孝大義勉勗諸生轉北雍學錄陞監丞同上

強尚質字繩一鄱陽人天性孝友愛弟撫姪曲盡恩禮
為人寬和莊重又負敏才作古今文詞援筆立就兼
善書畫晚以明經司訓建昌之新城師道卓然多士
愛而化之

同上

紀杭字勝卿鄱陽人生有異質聞祝無功輩講學徒步
從之遊凡六易寒暑不輟萬歷辛卯中乙榜就廷試
初訓鍾陵繼諭光化所至以興學作人為已任擢知
普安遂乞歸

湯廷耀餘千人萬厯中從劉綎征蜀積功至都督僉事
子應瑞少隨父行間每力戰先登崇禎初流氛日熾
奉調隨征父子血戰陷陣而死

人物志

史稽古字心堯鄱陽人萬厯間選貢授華亭丞陞陽山
令陽山故昌黎之桐鄉也齋有兩松相傳韓公手植
稽古至為之剪荒理穢每政餘即吟詠其下或操筆
為文不作猶人語著有僅存等集

同上

劉三策字叔簡鄱陽人與兄三省孝友最篤天啓辛酉

同登賢書念母老求祿養授棗陽學博內艱服闋補
廣西旋擢仁壽縣舊無城且乏兵守羣賊蜂起犯川
三策日練士卒扼險要為固守計未幾賊勢益張度
不能支遂令子居州懷印從間道詣府上之詰朝賊
大至率衆巷戰自已至午援兵竟絕出獄囚助之力
盡被執罵不絕口賊怒支解之

安志

江南錦字列明鄱陽人天啓丁卯鄉薦主試倪元璐獨
賞其奇以足疾不能上春官絕意進取專肆力於古

文辭著書多散逸梓以行者貌嶠書屋文集而已人
物志

葉應震字長東餘干人崇禎進士時楚氛孔亟起復楊
嗣昌為大司馬應震上章擊之不報授都水司主事
治河著績癸未陞四川副使未任會父歿哀毀骨立
事母孝養備至母歿茹蔬廬墓不復與人世間事食
貧二十年著有易鑑合叅五經纂註四貫等集

安志

詹時雨字霖臣鄱陽人崇禎進士給事中書科時上發

策問兵餉條對稱旨擢監察御史出巡福建以嚴直忤權要遷蘇松道隨督學貴州一秉虛公黔中得人

於斯為盛

同上

李思謨字承伯浮梁人崇禎進士令深陽留意教養時權相奏令各省童子分等第納銀免府縣考試諸路風靡思謨獨不奉行乙酉罷歸隱居鄉里卒於家

府

志

鮑文弘字士可浮梁人崇禎進士任惠州司理活疑獄

甚衆時土寇竊發設計討平之居鄉敦尚儒雅誘進後學凡邑利弊悉力言於當事人皆德之

安志

董尚行字篤卿德興人博通經史尤究心理學從明德先生遊悟性命之旨因有獨得諄諄以誘進後學為已任因著紀言編一卷既歿郡守張有譽請祀鄉賢同上

史乘古字爾力鄱陽人崇禎庚辰授寧津令承荒敝之餘推意休養民懷其惠又保守孤城以治行報最擢

永平治中未任歸

同上

高日臨字儼若鄱陽人崇禎壬申以恩選知四川大寧縣寧多高山深箐人跡罕到忽山後有賊自鹽井來倉猝間乏戰守備時夔護篆者方阻兵自衛日臨齧指血上書求援不報城遂陷不屈死之

同上

徐明揚字宗允浮梁人以選貢授山西平順知縣平順因山為城地僻民貧明揚抵任勸農課士緩征息訟民咸戴之崇禎六年流寇至議者曰叢爾孤城無與

為守曷若權宜避郡可乎明揚曰吾為朝廷守土設
不虞惟有死耳因設法守禦賊不能克後力竭城破
不屈以死

同上

胡重明字養元鄱陽人崇禎末以歲薦授贛州訓導後
署安遠縣事土司兵變逼城重明奮不顧身督卒固
守及城陷朱衣坐堂上不為動寇刃之并刃其家屬
七人

同上

羅伏龍字佐才餘干人崇禎庚午舉人福王時參史可

法幕代周志畏為江都知縣內治民事外理軍務晝
夜竭心力揚州被圍可法謂伏龍亟去伏龍曰大丈夫
豈可臨難苟免城破死之

白志

國朝

范文程字現斗祖貫樂平人九世祖景申戍遼左六世
生總字平甫明正德進士累官巡撫寧夏晉兵部尚
書總生澄澄生楠楠生文程幼補博士弟子員以文
武全才從

太祖皇帝龍飛叅贊機務克著元勲順治甲申

國家定鼎燕京以翊戴功晉內祕書院大學士掌院事
年未六旬即上章歸政退居林下構園亭於郊外日
讀書其中賦詩彈碁以自娛在政府掌機務十有七
載勲名壽考善始全終尤為世所罕及子承謨順治
壬辰進士歷官浙閩總督耿精忠反抗節不降而死

謚忠貞

人物志

史彪古字煥章鄱陽人順治壬辰進士入翰林改給事

中前後居諫垣十年性狷直後擢京卿歸里卒著有
梧垣奏議善惡明微等書

安志

王好善萬年人性孝友家居耕讀樂施與順治甲午大
旱歲飢倒廩出粟賑貧隣有賣妻鬻子者力為收贖
屢與鄉飲年八十三歲一門四代人以為善行之報
云

府志

楊鼎臣樂平人父明由為盜所執索多金贖命罄家不
能得鼎臣毅然以身易父還竟為盜殺邑令扁旌之

安志

黃有章字闇如鄱陽人順治己丑歲貢性耿介渾樸與物無競幼女曾受蕭氏聘蕭氏子被掠杳無音問有章誓不悔盟後二十年蕭氏子歸伊父母俱亡家無立錫有章撫養如己子甲寅避兵儒塘一日沐浴逝年八十有七

府志

王閱道字趙如鄱陽人家貧九歲猶未就傅有志向學以伯氏為師天資明敏弱冠食餼于庠以歲貢赴廷

試念親老亟歸侍養父疾危篤呼天請以身代已而
果瘳事兄撫弟備極友愛子傳康熙辛未進士翰林
院檢討貤封如其官閱道不改素履著書談道優游
泉石以終老人稱海岸先生

崇祀錄

洪國屏號耕石餘人以歲薦任訓導教諭歷十二年
陞中部知縣有惠政尋以老病乞休卒于邸清儉至
無以殯所著有尚書會旨幻真編諸書

府志

彭允升安仁人邑庠生康熙乙卯賊踞邑城允升團結

鄉勇禦賊被執勒招降所聚鄉勇不從遂遇害鄉人
義之為塑像祀本里白兔寺

同上

吳鎬字西澗安仁人幼喪父與叔同居事之猶父叔二
子鎬尤友愛之後叔子固求分析鎬不得已取貲產
三分之一餘悉以歸叔子族黨高其義讓尤工詩文

刻有西澗集

同上

沙坤瑞餘干人性至孝十六歲喪父衣棺無資典身殯
殮種蔬供母母目喪明每以舌洗其障膜母年八十

餘衰病不能起朝夕奉侍始終無怠及母終汲水以浴母不忍輕棄其水一飲而盡隣里感其孝憐其貧稍捐以葬廬墓三年致馴虎伏蟒之異

安志

按安志載餘于雷佩鄱陽黃天壽俱以孝稱為附識其名于此

胡之珩字集英餘于人居仁八世孫築室藏山之麓顏其堂曰希敬平生學問尤精于易兼通河洛理數晚充歲貢聘主東山書院教所著有希敬堂八箴東山

學規及詩經養正藏於家

白志

王傳字紹新鄱陽人康熙辛未進士由庶吉士歷官國子祭酒丁外艱服闋以母高年即請終養家居十五載養親課子外仍手一編為人沉靜不可干以私三校禮闈俱稱得士乙未視學山左嘗曰學臣清心寡欲不足異所難者衡才不爽尺寸耳優不濫俾中材絕倖獲心劣不苛令非才有容身地人服其公平雍正元年癸卯

特開恩科典試山左時大旱榜發甘霖立沛人稱為霖
雨榜所取中多老成名宿又號先生榜復

命後眷注優渥恩賚稠疊

御賜講幄清班四字匾額年六十五卒于官雍正三年
春

予祭葬

家傳

江西通志卷九十